

四庫全書

史部

欽定四庫全書

欽定續通志卷五

唐紀

五

中宗二 睿宗

神龍元年

考異曰新紀長安五年正月壬午大赦甲辰太子監國改元按則天寶錄神龍元年正月

壬午朔大赦改元舊制唐歷統紀會要皆同紀年通譜亦以神龍為武后年號中宗因之新紀誤也 春正

月癸卯張柬之崔玄暉及左羽林衛將軍敬暉檢校左羽林衛將軍桓彥範司刑少卿袁恕已左羽林衛將軍

李湛薛思行趙承恩右羽林衛將軍楊元琰左羽林衛

大將軍李多祚職方郎中崔泰之

按新書尚有庫部員外郎朱敬則吳績曰

按敬則傳敬則當武后時已嘗為相罷後為成均祭酒冬官侍郎鄭州刺史致仕且未嘗為庫部員外郎而本傳亦不言其同誅二張雖有與敬暉密議誅之之策然傳亦止云暉卒用其策亦不言敬則同與其事也疑此誤載

一名

司刑評事冀仲甫檢校司農少卿蕪知總監翟世

言內直郎王同皎率左右羽林兵以討亂張易之昌宗

昌期同休景雄伏誅甲辰皇太子監國命地官侍郎樊

忱往京師告廟陵

按舊書監國下不復云改元新書監國下設云改元說見前

丙午

皇帝復于位大赦惟易之黨與不在原限為周興來俊  
臣所枉陷者咸令雪寃賜文武官階爵民酺五日免今  
歲租賦給復房州三年放宮女三千人相王旦為安國  
相王太尉同鳳閣鸞臺三品丁未徙后于上陽宮戊申  
上后號曰則天大聖皇帝庚戌張柬之袁恕己同鳳閣  
鸞臺三品崔玄暉守內史敬暉為納言桓彥範守納言  
甲寅復國號唐社稷宗廟陵寢郊祀行軍旗幟服色天  
地日月寺宇臺閣官名並依永淳以前故事神都依舊

為東都北都為并州大都督府老君依舊為玄元皇帝  
貶韋承慶為高要尉流房融于高州楊再思同中書門  
下三品姚元之罷甲子皇后韋氏復于位大赦賜酺三  
日復宗室死于周者官爵丙寅太子賓客武三思為司  
空同中書門下三品貶譙王重福為濮州刺史丁卯右  
散騎常侍駙馬都尉武攸暨為司徒辛未安國相王旦  
罷甲戌太子少詹事祝欽明同中書門下三品韋安石  
罷進封子義興郡王重俊為衛王北海郡王重茂為溫

王丁丑武三思武攸暨罷三月甲申詔文明後破家者  
昭洗之還其子孫蔭惟徐敬業一房不在免限乙丑袁  
恕己守中書令夏四月辛亥桓彥範為侍中袁恕己為  
中書令丁卯高要尉魏元忠為衛尉卿同中書門下平  
章事辛未敬暉為侍中甲戌魏元忠崔玄暉刑部尚書  
韋安石為吏部尚書太子右庶子李懷遠為左散騎常  
侍涼州都督唐休璟為輔國大將軍同中書門下三品  
乙亥張柬之為中書令五月壬午遷武氏神主于崇恩

廟乙酉立太廟社稷于東都戊子復周隋二王後壬辰  
進封兄成紀郡王千里為成王甲午侍中敬暉平陽郡  
王桓彥範扶陽郡王賜姓韋氏中書令張柬之漢陽郡  
王袁恕已南陽郡王特進崔玄暉博陵郡王並加授特  
進罷知政事韋安石兼檢校中書令魏元忠兼侍中癸  
卯降梁王武三思為德靜郡王定王武攸暨為樂壽郡  
王河內王武懿宗等並降為國公甲辰唐休璟為尚書  
左僕射特進豆盧欽望為尚書右僕射同中書門下三

品六月壬子左驍衛大將軍裴思諒為靈武道行軍大  
總管以備突厥丁巳河北十七州大水癸亥韋安石為  
中書令魏元忠為侍中楊再思檢校中書令豆盧欽望  
平章軍國重事秋七月辛巳太子賓客韋巨源同中書  
門下三品甲辰洛水溢八月戊申給復河南洛陽二縣  
一年壬戌追冊妃趙氏為皇后乙亥帝親祔太祖獻祖  
世祖高祖太宗高宗皇兄義宗神主于太廟皇后見于  
廟丁丑幸洛城南門觀關象九月壬午祀天地于明堂



大赦賜文武官勲爵民酺三日癸巳章巨源罷冬十月  
癸亥章龍門乙丑獵于新安辛未魏元忠為中書令楊  
再思為侍中十一月戊寅上尊號曰應天皇帝皇后曰

順天皇后

謹按通鑑輯覽

御批此直仿高宗稱天皇武后稱天后故事明勸  
章氏蹈轍夫章災樂禍自古無此下惠不移者

壬午及皇

后享于太廟大赦賜文武官階勲爵民酺三日己丑辛

洛城南門觀發寒胡戲壬寅武氏死

謹遵輯覽書法

廢崇恩廟

二年春正月戊戌吏部尚書李嶠同中書門下三品中

書侍郎于惟謙同中書門下平章事閏月丙午公主開  
府置官屬乙卯以特進敬暉桓彥範袁恕己為滑洺豫  
刺史二月乙未禮部尚書韋巨源為刑部尚書同中書  
門下三品丙申遣十道巡察使三月甲辰韋安石罷戶  
部尚書蘇瓌守侍中戊申唐休璟罷庚戌殺光祿卿駙  
馬都尉王同皎是月置員外官壬戌贈后父韋元貞太  
師益州都督夏四月甲戌又贈元貞為鄴王后弟四人

並贈郡王

按洵浩洞訖皆韋后之弟非元貞之弟也舊書作元貞弟誤今改正

己丑李懷

遠罷辛丑洛水溢六月戊寅貶敬暉為崖州司馬桓彥  
範瀧州司馬袁恕已竇州司馬崔玄暉白州司馬張東  
之新州司馬秋七月戊申立衛王重俊為皇太子丙寅  
魏元忠為尚書右僕射兼中書令李嶠守中書令辛未  
左散騎常侍致仕李懷遠同中書門下三品流敬暉于

瓊州

新紀作嘉州今依敬暉傳改輯錄考異曰實錄初云嘉州後云崖州新本紀作嘉州舊傳作崖州今

從新傳

桓彥範于瀛州袁恕已于環州崔玄暉于古州張

東之于瀧州八月丙子貶祝欽明為申州刺史九月戊

午李懷遠薨冬十月癸巳蘇瓌為侍中戊戌至自東都  
十二月己卯靈武軍大總管沙吒忠義及突厥戰于鳴  
沙敗績丙戌以突厥寇邊京師旱河北水減膳罷土木  
工蘇瓌存撫河北丙申魏元忠為尚書左僕射

景龍元年春正月丙辰以旱慮因二月丙戌復武氏廟  
陵置令丞守戶如昭陵甲午褒德廟榮先陵置令丞夏  
四月庚寅赦雍州五月戊戌右屯衛大將軍張仁亶為  
朔方道行軍大總管以備突厥丙午假鴻臚卿臧思言

使于突厥死之以旱避正殿減膳六月丁卯朔日有食  
之戊子吐蕃及姚州蠻寇邊姚嵩道討擊使唐九徵敗  
之秋七月辛丑皇太子以羽林千騎兵誅武三思衆潰

死之

按新書云皇太子以羽林千騎兵誅武三思不克

死之吳縝曰楊節愍太子及武三思傳其三思父  
子皆已為節愍所誅止是太子之衆自潰故太子被害  
耳不得謂之誅三思不克也當云以羽林千騎兵誅武

三思已而衆潰死之如此  
乃盡其實今依糾謬改壬戌李嶠為中書令八月丙

戌上尊號曰應天神龍皇帝皇后曰順天胡聖皇后魏  
元忠罷九月丁酉吏部侍郎蕭至忠為黃門侍郎兵部

尚書宗楚客左衛將軍兼太府卿紀處訥同中書門下

三品于惟謙罷庚子大赦改元賜文武官階勲爵辛亥

楊再思為中書令韋巨源紀處訥為侍中蘇瓌罷

考異

曰新表九月辛亥蘇瓌罷為行吏部尚書按二年瓌請察正員官殿員者擇員外官代之三年面折祝欽明請皇

后亞獻于時更為侍

中表云今年罷誤也冬十月戊寅殺習藝館內教蘇安

恒十二月乙丑朔日有食之

二年春二月庚寅帝以后服有慶雲之瑞大赦天下進

五品以上母妻封號二等無妻者授其女婦人八十以

上版授郡縣鄉君三月丙子朔方道大總管張仁亶築  
受降城于河上夏四月癸未置修文館學士秋七月癸  
巳朔方道行軍大總管張仁亶同中書門下三品冬十一  
月庚申西突厥寇邊御史中丞馮嘉賓使于突厥死之  
已卯以安樂公主出降假皇后仗出于禁中帝及后御  
安福樓觀之禮畢大赦賜酺三日

按新舊紀皆云已卯  
景龍文館記作庚辰

蓋禮成之  
明日也

癸未安西都護牛師獎及西突厥戰于火燒

城死之是歲皇后妃王昭客賣官行墨敕斜封

三年春二月己丑及皇后幸玄武門觀宮女拔河為宮  
市以嬉壬寅韋巨源為尚書左僕射楊再思為右僕射  
同中書門下三品壬子及皇后幸太常寺三月戊午宗  
楚客為中書令蕭至忠守侍中太府卿韋嗣立守兵部  
尚書同中書門下三品中書侍郎兼檢校吏部侍郎崔  
湜守兵部侍郎趙彥昭為中書侍郎同中書門下平章  
事戊寅禮部尚書韋溫為太子少保同中書門下三品  
太常少卿鄭愔守吏部侍郎同中書門下平章事夏五



月丙戌貶崔湜為襄州刺史鄭愔江州司馬六月庚子以旱避正殿減膳撤樂詔括天下圖籍壬寅慮囚癸卯楊再思薨秋七月丙辰西突厥娑葛降辛酉許婦人非緣夫子封者蔭其子孫癸亥慮囚庚辰澧水溢八月乙酉李嶠同中書門下三品特進韋安石為侍中壬辰有星孛於紫宮九月戊辰吏部尚書蘇瓌為尚書左僕射同中書門下三品冬十一月乙丑有事于南郊以皇后為亞獻大赦賜文武官階爵入品者減考免闕內今歲

賦賜酺三日甲戌豆盧欽望薨十二月壬辰前宋國公  
致仕唐休璟為太子少師同中書門下三品甲午如新  
豐溫湯甲辰赦新豐給復一年賜從官勲一轉乙己至  
自新豐

四年春正月丙寅及皇后微行以觀燈遂幸蕭至忠第  
丁卯微行以觀燈幸韋安石長寧公主第己卯如始平  
送金城公主歸吐蕃二月庚戌及后妃公主觀三品以  
上拔河三月以河源九曲子吐蕃夏四月乙未幸隆慶

池 考異曰景龍文館記以為其月十二日  
按長曆是月壬午朔今從實錄本紀 五月辛酉封

嗣號王邕為汴王丁卯許州司兵參軍燕欽融上書言

皇后干預國政安樂公主武延秀宗楚客等同危宗社

帝怒召欽融廷見撲殺之丁丑剡縣地震六月安樂公

主與后合謀進鴆壬午帝遇毒崩于神龍殿年五十五

按中宗生于高宗顯慶元年丙辰至景龍四年庚戌應以新紀年五十五為是舊紀作年五十誤 諡曰

孝和皇帝廟號中宗陵曰定陵天寶十三載加諡大和

大聖大昭孝皇帝

中宗嗣聖一年被廢二十年神龍二年景龍四年  
凡二十七年

睿宗皇帝諱旦高宗第八子中宗母弟也始封殷王領  
冀州大都督單于大都護長而溫恭好道學詰訓工草  
隸書徙封豫王又封冀王初名旭輪至是去旭字累遷  
右金吾衛大將軍洛州牧徙封相王復封豫王改名旦  
武后廢中宗立為皇帝其改國號周以為皇嗣居于東  
宮依舊名輪中宗自房州還復為皇太子武后封皇嗣

為相王又改名旦授太子右衛率累遷右羽林衛大將軍并州牧安北大都護諸道元帥中宗復位進號安國相王遷太尉知政事又立為皇太子固辭不受

景雲元年六月壬午韋皇后弒中宗矯詔立溫王重茂為皇太子以刑部尚書裴談工部尚書張錫同中書門下三品吏部尚書張嘉福中書侍郎岑羲吏部侍郎崔湜同中書門下平章事發諸府兵五萬屯京師以韋溫總知內外兵馬甲申乃發喪又矯遺詔自立為皇太后

皇太子即皇帝位以睿宗參謀政事大赦改元曰唐隆  
太后臨朝攝政罷睿宗參謀政事以為太尉封嗣雍王  
守禮為邠王壽春郡王成器宋王丁亥溫王妃陸氏為  
皇后壬辰紀處訥張嘉福岑羲持節巡撫關內河南北  
庚子臨淄郡王隆基率萬騎兵入北軍討亂誅韋氏安  
樂公主及韋巨源馬秦客駙馬都尉武延秀光祿少卿  
楊均辛丑睿宗奉少帝御安福門大赦賜文武官階勳  
爵免天下歲租之半進封隆基為平王朝邑尉劉幽求

為中書舍人苑總監鍾紹京為中書侍郎叅知機務壬寅紹京及黃門侍郎李日知同中書門下三品紀處訥韋溫宗楚客將作大匠宗晉卿司農卿趙履溫伏誅貶汴王邕為沁州刺史蕭至忠許州刺史韋嗣立宋州刺史趙彥昭絳州刺史崔湜華州刺史癸卯平王隆基同中書門下三品鍾紹京行中書令張嘉福伏誅王公百官表請睿宗即尊位甲辰安國相王即皇帝位于承天門大赦長流長任及流人未達者還之賜內外官階爵

後少帝為溫王乙巳鍾紹京罷丙午太常少卿薛稷為  
黃門侍郎參預機務丁未立平王隆基為皇太子復則  
天大聖皇后號曰天后戊申許州刺史姚元之為兵部  
尚書同中書門下三品韋嗣立蕭至忠為中書令趙彥  
昭為中書侍郎崔湜為吏部侍郎同中書門下平章事  
秋七月庚戌進封衡陽郡王成義為申王巴陵郡王隆  
範岐王彭城郡王隆業薛王癸丑兵部尚書崔日用為  
黃門侍郎參預機務追謚雍王賢為章懷太子庶人重



俊曰節愍太子復敬暉桓彥範崔玄暉張柬之袁恕己  
成王千里李多祚等官爵丁巳洛州長史宋璟檢校吏  
部尚書同中書門下三品岑義罷壬戌貶蕭至忠為晉  
州刺史韋嗣立許州刺史趙彥昭宋州刺史張錫絳州  
刺史崔湜罷丙寅貶李嶠為懷州刺史姚元之兼中書  
令蘇瓌為尚書左僕射丁卯唐休璟張仁亶罷己巳大  
赦改元賜內外官及子為父後者勳一轉崔日用薛稷  
罷乙亥廢崇恩廟昊陵順陵追廢皇后韋氏為庶人安

樂公主為悖逆庶人八月庚寅譙王重福及汴州刺史  
鄭愔反伏誅癸巳罷墨敕斜封官貶裴談為蒲州刺史  
九月辛未太子少師致仕唐休璟為朔方道行軍大總  
管以備突厥冬十月乙未追號天后曰大聖天后癸卯  
出義宗于大廟十一月戊申姚元之為中書令己酉葬  
中宗皇帝于定陵壬子蘇瓌韋安石罷宋王成器為尚  
書左僕射己巳宋王成器為司徒

二年春正月己未太僕卿郭元振中書侍郎張說同中

書門下平章事甲子徙封重茂為襄王乙丑追冊妃劉氏竇氏為皇后二月丁丑皇太子監國甲申貶姚元之為申州刺史宋璟楚州刺史丙戌太子少保韋安石為侍中劉幽求罷復墨敕斜封官三月癸丑作金仙玉真觀夏四月甲申韋安石為中書令宋王成器罷辛卯李日知為侍中壬寅大赦賜文武官階勳爵民酺三日甲辰作玄元皇帝廟五月庚戌復昊陵順陵置官屬壬戌殿中監竇懷貞為左御史臺大夫同中書門下平章事

秋八月乙卯大赦賜酺三日丁巳皇太子釋奠于國學

庚午韋安石為尚書左僕射同中書門下三品九月乙

亥竇懷貞為侍中

睿宗實錄在乙卯太上皇實錄在庚辰舊紀在己卯

冬十月甲

辰吏部尚書劉幽求為侍中右散騎常侍魏知古太子

詹事崔湜為中書侍郎同中書門下三品中書侍郎陸

象先同中書門下平章事韋安石李日知郭元振竇懷

貞張說罷十二月丁未作發寒胡戲

延和元年

按舊書作景雲三年新書作先天元年是年正月即改元太極不必復云景雲八月改元

先天係玄宗年號不得編作睿宗紀今以五月戊寅改元延和紀年春正月辛未享于太

廟辛巳有事于南郊戊子耕藉田己丑大赦改元曰太

極賜內外官階爵民酺五日版授九十以上下州刺史

八十以上上州司馬辛卯幸安福門觀酺三日夜

考異曰新

紀表士長以陸象先同中書門下三品太上皇睿宗實錄舊紀皆無之不知新書何據今不取乙未戶

部尚書岑羲左御史臺大夫竇懷貞同中書門下三品

二月丁巳皇太子釋奠于國學夏五月戊寅有事于北

郊辛巳大赦改元延和賜內外官陪禮者勳一轉民酺

五日六月癸丑岑羲為侍中乙卯追號大聖天后為天后聖帝辛酉刑部尚書郭元振為朔方道行軍大總管

以伐突厥甲子幽州都督孫佺

舊書作  
孫儉

左武衛將軍李

楷洛左威衛將軍周以悌及奚戰于冷陁山敗績秋七月辛未兵部尚書李迥秀為朔方道後軍大總管乙亥

竇懷貞為尚書右僕射平章軍國重事己卯辛安福門觀樂三日而止丙戌以旱減膳八月庚子立皇太子為皇帝自尊為太上皇五日一受朝于太極殿自稱曰朕

五品以上除授及大刑獄並自決之其處分事稱詔令  
皇帝每日受朝于武德殿自稱曰予五品以下除授及  
重罪並令決之處分事稱制敕壬寅追號天后聖帝為  
聖后甲辰大赦改元先天賜內外官及五品以上子為  
父後者勲爵民酺五日丁未立皇太子妃王氏為皇后  
戊申皇帝子許昌王嗣直改封鄭王真定王嗣謙改封  
郢王己酉宋王成器為司徒庚戌竇懷貞為尚書左僕  
射劉幽求守尚書右僕射同中書門下三品魏知古為

侍中崔湜檢校中書令戊午流劉幽求于封州九月丁  
卯朔日有食之甲午封皇帝子嗣昇為陝王冬十月辛  
卯獵于驪山十一月丁亥誥遣皇帝巡邊甲午幽州都  
督宋璟為左軍大總管并州長史薛訥為中軍大總管  
兵部尚書郭元振為右軍大總管先天二年春正月乙  
亥吏部尚書蕭至忠為中書令二月追作先天元年  
六日辛丑以雨霖避正殿減膳丙辰郭元振同中書門  
下三品秋七月甲子大赦乙丑誥歸政于皇帝開元四



年六月崩于百福殿年五十五諡曰大聖貞皇帝廟號睿宗陵曰橋陵天寶十三載增諡元真大聖大興孝皇

帝

睿宗景雲一年

此年即中宗景龍四年

延和一年凡二年

欽定續通志卷五

欽定四庫全書

欽定續通志卷六

唐紀 六

玄宗一

玄宗皇帝諱隆基睿宗第三子也母曰昭成順聖皇后  
竇氏性英武善騎射通音律厯象之學垂拱三年封楚  
王長壽二年改封臨淄郡王歷右衛郎將尚輦奉御遷  
衛尉少卿兼潞州別駕景龍四年來朝京師遂留不遣

庶人常氏已弒中宗矯遺詔稱制常溫宗楚客紀處訥等謀傾宗社以睿宗介弟之重先謀不利玄宗乃與太平公王子薛崇簡尚衣奉御王崇晷公主府典籤王師虔朝邑尉劉幽求苑總監鍾紹京長上折衝麻嗣宗押萬騎果毅葛福順李仙晷道士馮處澄僧普潤等定策討之或請先啓相王玄宗曰請而從是王與危事也不從則吾計失矣事成福歸于王不成以身死之不以累王

也  
謹按通鑑輯覽

御批胡寅以臨淄不先白相王蓋欲自為此論刻而無當相  
王仁柔本非唐高祖之比臨淄默定大計不得不周詳審  
慎觀於事成歸王不成不累王之語  
其於天理人心亦可謂光明正大矣  
乃夜率幽求等入苑

中福順仙鳧以萬騎兵攻立武門斬羽林將軍韋播高  
嵩以徇左萬騎自左入右萬騎自右入立宗率總監羽林  
兵會兩儀殿梓宮宿衛兵皆起應之遂誅韋氏黎明馳  
謁睿宗謝不先啟睿宗泣曰宗社賴汝以定不然吾且  
及難乃拜立宗殿中監同中書門下三品兼押左右萬  
騎進封平王睿宗即位議立皇太子僉曰除天下之禍

者享天下之福拯天下之危者受天下之安平王有聖德定天下又聞成器已下咸有推讓宜膺主鬯以副羣心睿宗從之六月丁未立為皇太子有司擇日備禮册命七月己巳睿宗御承天門皇太子詣朝堂受册景雲二年命皇太子監國聽除六品以下官延和元年六月星官言帝座及前星有變睿宗曰傳德避灾吾意決矣七月壬辰制傳位於皇太子太子惶懼馳入見涕泣固辭睿宗曰此吾所以答天戒也皇太子乃御武德殿視

事先天元年

延和元年八月改元先天

十月庚子享于太廟大赦

開元元年秋七月甲子尚書左僕射竇懷貞侍中岑羲

中書令蕭至忠崔湜雍州長史李晉左羽林大將軍常

元楷右羽林將軍李慈等與太平公主謀反伏誅乙丑

睿宗下詔軍國政刑一事已上並取皇帝處分大赦賜

文武官階爵有差丁卯崔湜盧藏用除名長流嶺表甲

戌令毀天樞乙亥尚書左丞張說檢校中書令庚辰陸

象先罷

上二事舊書皆係癸丑與新書異然癸丑又係癸酉之謚

己丑周孝明高皇

帝依舊贈太原王去帝號孝明皇后稱太原王妃吳陵  
順陵並稱太原王及妃墓八月壬辰劉幽求為尚書左  
僕射知軍國重事壬寅宋王成器為太尉申王成義為  
司徒邠王守禮為司空九月丁卯宋王成器罷庚午劉  
幽求同中書門下三品燕國公張說為中書令冬十月  
姚嵩蠻寇姚州都督李蒙死之辛卯引見京畿縣令已  
亥如溫湯舊書作  
甲申癸卯講武于驪山沔郭元振于新州  
斬給事中唐紹免新豐來歲稅甲辰獵于渭川同州刺

史姚元之為兵部尚書同中書門下三品乙巳至自溫

湯十一月乙丑劉幽求兼侍中戊子羣臣上尊號曰開

元神武皇帝 謹接通鑑輯覽

御批人君救幾圖治惟當務實宜在崇尚虛名無論其獻媚  
貢諛不可為訓即以君上之尊而使臣下妄加稱謂以為  
榮亦復成何治體况尊號乃高宗以來弊政明皇方銳意  
維新顧于此仍循舊轍蓋不待天寶改元已萌不克自持  
之幾矣 十二月庚寅朔大赦改元賜內外官勲改尚書左右

僕射為左右丞相中書省為紫微省門下省為黃門省  
侍中為監雍州為京兆府洛州為河南府甲午吐蕃請



和己亥禁斷潑寒胡戲壬寅姚宗兼紫微令癸丑劉幽  
求罷張說為相州刺史甲寅黃門侍郎盧懷慎同紫微  
黃門平章事

二年春正月關中自去秋至于是月不雨壬午遣使賑  
給求直諫寬繫囚祠名山大川甲申并州節度大使薛  
訥同紫微黃門三品總兵以伐奚契丹二月突厥寇北  
庭都護府右驍衛將軍郭虔瓘擊敗之己酉慮囚西突  
厥酋長都擔叛三月己亥磧西節度使阿史那獻擒斬

之夏四月辛未停諸陵供奉鷹犬五月辛亥魏知古罷  
六月丁巳開府儀同三司宋王成器為岐州刺史司徒  
申王成義為幽州刺史司空邠王守禮為號州刺史委  
務於上佐秋七月乙未禁綠珠玉廢錦坊內出珠玉錦  
繡服玩於正殿前焚之

謹按通鑑輯覽

御批劉友益謂特書予之未為切當明皇非直能

斷雕為樸者不過博崇儉美名以飾觀聽耳

皇祖譏其矯激太甚觀未幾復遣使求珍翠  
奇寶前後判然不侔誠不能捨其情偽矣  
庚子薛訥及奚契

丹戰於灤河敗績訥等遁歸減死除名為庶人丁未襄

王重茂薨於梁州諡曰殤帝八月乙亥吐蕃寇臨洮軍  
又寇蘭州渭州掠羣牧起薛訥攝左羽林將軍隴右防  
禦使以禦之九月庚寅作興慶宮丁酉宴京師父老子  
舍元殿庭賜九十以上几杖八十以上鳩杖婦人亦如  
之就賜于家太常卿岐王範為華州刺史秘書監薛王  
業為同州刺史戊申如溫泉冬十月戊午至自溫泉甲

子薛訥及吐蕃戰於武階敗之

通鑑綱目並作武街胡三省曰水經注武街城在漢

狄道縣東白石山西北唐為武街驛與大來谷皆屬臨洮渭源縣界

豐安軍使王海賓力

戰死之十二月乙丑封子嗣真為鄴王嗣初鄂王嗣玄  
鄧王

三年春正月丁亥立郢王嗣謙為皇太子降死罪已下  
大酺三日癸卯盧懷慎檢校黃門監二月辛酉赦囚非  
惡逆造偽者突厥十姓部落及高麗莫離支文簡都督  
跌思太等各率其衆自突厥相繼來降前後萬餘帳以  
河南地處之夏四月庚申右羽林大將軍薛訥為涼州  
鎮軍大總管涼州都督楊執一副之左衛大將軍郭虔

璿為朔州鎮軍大總管并州長史王峻副之以備突厥

岐王範兼虢州刺史薛王業兼幽州刺史

舊紀作幽州而傳作幽州

然幽與龍俱近畿之地自當從幽為是

五月丁未以旱慮囚戊申避正殿

減膳六月山東諸州大蝗遣御史下諸道捕之是歲有

秋秋七月庚辰朔日有食之冬十月甲寅制選耆儒博

學一人每日入內侍讀以光祿卿馬懷素為左散騎常

侍褚无量並充侍讀辛酉雋州蠻寇邊右驍衛將軍李

玄道伐之壬戌薛訥為朔方道行軍大總管太僕卿呂

延祚靈州刺史杜賓客副之甲子如鄆縣之鳳泉湯十一月己卯至自鳳泉湯乙酉如新豐之溫湯丁亥相州妖賊崔子嵩反伏誅甲午至自溫湯

四年春正月丁亥宋王成器更名憲申王成義更名撓二月丙辰如新豐之溫湯辛酉吐蕃寇松州廓州刺史蓋恩貴伐之丁卯至自溫湯癸酉松州都督孫仁獻及吐蕃戰敗之以關中旱遣使祈雨于驪山夏六月癸亥太上皇崩癸酉突厥可汗默啜為九姓拔曳固所殺斬

其首送京師是夏山東河南河北蝗蟲大起遣使分捕  
之秋七月丁丑吐蕃請和丁酉洛水溢八月辛未奚契  
丹降冬十月庚午葬睿宗皇帝于橋陵十一月己卯盧

懷慎罷

按舊書不載盧懷慎罷而云辛丑黃門監兼吏部尚書盧懷慎卒宰相表載十一月己卯懷慎

去官養疾通鑑云己卯盧懷慎疾亟上表薦宋璟李傑李朝隱盧從愿上深納之與新書同蓋己卯乃罷官之日而舊書卒于辛丑通鑑載于乙未綱目不書卒日未知孰是

丁亥徙中宗神主于西

廟丙申尚書左丞源乾曜為黃門侍郎同紫微黃門平

章事十二月乙卯如新豐之溫湯乙丑至自溫湯閏月

己亥姚崇源乾曜罷刑部尚書宋璟為吏部尚書兼黃  
門監紫微侍郎蘇頲同紫微黃門平章事

五年春正月癸卯太廟四室壞遷神主于太極殿帝素

服避正殿輟朝五日己酉享于太極殿辛亥如東都二

月甲戌

舊書于此日云至自東都考明皇此行于六年十一月始還京師此當云至東都而誤衍自字

也大赦唯謀反大逆不在赦限給復河南一年免河南

河北遭水及蝗蟲處今年租武德貞觀以來勲臣子

孫無位者訪求其後奏聞有嘉避幽棲養高不仕者州



牧各以名薦三月丙寅吐蕃請和夏四月甲午毀則天  
拜洛受圖壇及碑文并顯聖侯廟五月丙辰詔公侯子  
孫襲封六月壬午鞏縣暴雨連月山水泛溢汜水同日  
泛溢秋七月壬寅隴右節度使郭知運及吐蕃戰敗之  
甲子復以明堂為乾元殿九月壬寅復紫微省為中書  
省黃門省為門下省黃門監為侍中冬十月丙子修太  
廟成丁丑詔以故越王貞死非其罪封故許王男淋為  
嗣越王以繼其後戊寅祔神主于太廟十一月司徒兼

鄧州刺史申王撫兼虢州刺史

六年春正月辛丑突厥請和禁斷天下諸州惡錢行二  
銖四分以上好錢不堪用者並即銷破覆鑄遷孝敬皇  
帝神主于別廟太子少師兼許州刺史岐王範兼鄭州

刺史二月甲戌禮幣徵富山隱士盧鴻

考異曰舊傳作  
盧鴻一本紀新

傳皆作鴻按中岳真人劉  
君碑云盧鴻撰今從之

夏六月甲申瀍水溢乙酉制

以故侍中桓彥範敬暉中書令兼吏部尚書張柬之特  
進崔玄暉中書令袁恕已配饗中宗廟庭故司空蘇瓌

左丞相太子少保郴州刺史劉幽求配饗睿宗廟庭秋  
八月以旱慮囚冬十月癸亥賜河南府及懷汝鄭三州  
父老帛十一月辛卯至自東都丙申享于太廟詔元皇  
帝已上三祖枝孫失官者各與五品京官內外三品以  
上有廟者各賜物三十匹以備修祭服及俎豆賜文武  
官有差免知頓及旁州供承者租一年是月突厥執單  
于副都護張知運十二月以開府儀同三司兼澤州刺  
史宋王憲為涇州刺史司徒兼虢州刺史申王撝為隆

州刺史太子少師兼鄭州刺史岐王範為岐州刺史太子少保兼徽州刺史薛王業為虢州刺史

七年夏五月己丑朔日有食之帝素服徹樂減膳命中書門下慮囚六月戊辰吐蕃復請和秋八月辛卯敕自今五服並依喪服傳文九月甲寅徙封宋王憲為寧王冬十月辛卯如新豐之温湯癸卯至自温湯十一月乙亥皇太子詣國學行齒胄禮陪位官及學生賜物有差八年春正月甲子朔皇太子加元服乙丑皇太子謁太

廟丙寅會百官於太極殿賜物有差己卯宋璟蘇頲罷  
京兆尹源乾曜為黃門侍郎并州大都督府長史張嘉  
貞為中書侍郎同中書門下平章事三月甲子免水旱  
州逋賦給復四鎮行人家夏五月丁卯源乾曜為侍中  
張嘉貞為中書令六月庚寅洛瀍穀水溢舊書作  
壬寅秋九月  
突厥寇甘源等州涼州都督楊敬述與戰敗績王峻檢  
校幽州都督節度河北諸軍大使黃門侍郎韋抗為朔  
方道行軍大總管以伐之甲子太子少師兼岐州刺史

岐王範兼太子少傅太子少保兼號州刺史薛王業為  
太保丙寅降京城罪囚冬十月辛巳如長春宮壬午畋  
于下邳庚寅如新豐之溫湯十一月乙卯至自溫湯  
九年春正月議檢括戶口丙辰改蒲州為河中府置中  
都丙寅如新豐之溫湯乙亥至自溫湯二月丙戌突厥  
復請和丁亥免天下七年以前逋賦以宇文融充檢括  
戶口使夏四月庚寅蘭池胡康待賓叛攻陷六胡州王  
峻發隴右諸軍及河東九姓伐之秋七月戊申罷中都

依舊為蒲州己酉王峻大破康待賓生擒之辛酉康待  
賓伏誅八月蘭池胡康願子復叛九月乙巳朔日有食  
之癸亥天兵軍節度大使張說為兵部尚書同中書門  
下三品冬十一月丙辰左散騎常侍元行沖上羣書目  
錄二百卷庚午冬至大赦賜內外官階爵唐隆先天寶  
封功臣坐事免若死者並量加收贈民酺三日十二月  
乙酉如新豐之溫湯壬辰至自溫湯

十年春正月丁巳如東都癸亥停天下公廨錢以稅戶

錢充百官俸乙丑收內外官職田給還逃戶及貧下戶

欠丁田

舊書停公廨錢在乙丑收職田在戊申考戊申不應在乙丑之後此據通鑑改

夏四月

己亥以張說兼朔方軍節度大使五月伊汝水溢閏月張說如朔方軍巡邊六月丁巳河決博棣二州己巳增

太廟為九室遷中宗神主還太廟

按禮樂志亦在十年而舊書于十一年四

月復云遷祔中宗神主于太廟事屬重出新書于此月並不書增置九室事而于十一年五月云復中宗于太廟蓋承舊書之謫也今依舊書仍輯于十年而舊書新書十一年所載遷祔事皆削而不書

秋八月

丙戌安南人梅叔鸞反驃騎將軍兼內侍楊思勗討斬



之丁亥遣戶部尚書陸象先往汝許等州存撫賑給九月張說擒康願子于木盤山詔徙河曲六州殘胡五萬餘口于許汝唐鄧仙豫等州始空河南朔方千里之地已卯京兆人權梁山反伏誅癸未吐蕃攻小勃律北庭節度使張孝嵩敗之冬十月癸丑復以乾元殿為明堂甲寅如壽安之故興泰宮獵于上宜川庚申還東都

十一年春正月丁卯降東都囚罪杖以下原之己巳如并州降所至囚罪徒以下原之庚辰次潞州宴父老曲

赦大辟罪已下給復五年辛卯至并州置北都改并州  
為太原府給復一年下戶三年元從戶五年二月戊申  
還次晉州己酉貶張嘉貞為幽州刺史壬子至汾陰祠  
后土賜文官階勳爵帛癸亥張說兼中書令三月庚午  
車駕還京師免所過今年稅赦京城夏四月癸亥張說  
正除中書令吏部尚書王峻為兵部尚書同中書門下  
三品五月己丑王峻兼朔方軍節度大使六月王峻如  
朔方軍巡邊秋八月戊申追號宣皇帝曰獻祖光皇帝

曰懿祖始祔于太廟之九室冬十月丁酉如新豐之溫泉作溫泉宮甲寅至自溫泉十一月戊寅有事于南郊大赦賜奉祠官階勲親王公主一子官賜高年粟帛孝子順孫終身弗事天下酺三日京城五日十二月甲午如鳳泉湯庚申至自鳳泉湯貶王峻為蘄州刺史

十二年夏四月封故澤王上金男義珣為嗣澤王嗣許王瓘左授鄂州別駕癸卯嗣江王禕降為信安郡王嗣蜀王禴為廣漢郡王嗣密王徹為濮陽郡王嗣曹王臻

為濟國公嗣趙王琚為中山郡王武陽郡王堪為澧國  
公禕等並自神龍之後相繼為王以權利澤王之封盡  
令歸宗改封焉秋七月己卯廢皇后王氏為庶人后弟  
太子少保駙馬都尉守一貶為潭州別駕舊書作澤州  
別駕此據通鑑改蓋以路  
出藍田知之至藍田賜死貶戶部尚書張嘉貞為台州  
刺史冬十一月庚午如東都庚辰申王撝薨五溪首領  
覃行璋反遣鎮軍大將軍兼內侍楊思勗討平之閏十  
二月丙辰朔日有食之

十三年春正月戊子降死罪流己下原之遣使分道疏  
決囚徒二月戊午如龍門即日還宮乙亥初置曠騎三  
月甲午皇太子嗣謙改名鴻徙封郟王嗣直為慶王更  
名潭陝王嗣昇為忠王更名浚鄆王嗣真為棣王更名  
洽鄂王嗣初為郎王更名涓鄆王嗣玄為榮王更名滉又  
封子浚為光王濞儀王澧潁王澤永王清壽王洵延王  
沐盛王溢濟王夏五月庚寅妖賊劉定高等夜犯通洛  
門捕得伏誅秋九月丙戌敕母奏祥瑞冬十月癸丑新

造銅儀成辛酉如兗州庚午次濮州賜河南北五百里  
內父老帛十一月丙戌至兗州庚寅封泰山辛卯禪於  
社首壬辰大赦賜文武官階勲爵致仕官一季祿公主嗣  
王郡縣主一子官諸蕃酋長來會者一官免所過一歲  
租兗州二歲天下酺七日丙申如孔子宅親設奠祭十  
二月己巳還東都是冬分吏部為十銓敕禮部尚書蘇  
頴刑部尚書韋抗工部尚書盧從愿等分掌選事

十四年春二月庚戌朔邕州獠梁大海等據賓橫等州

叛楊思勗討平之

寶錄作二月己酉

夏四月丁巳戶部侍郎李

元紘同中書門下平章事庚申張說罷丁卯岐王範薨

辛丑于定恒莫易滄等五州置軍以備突厥六月戊午

以旱暴風雨命中外官言事秋七月癸未瀍水溢八月

丙午河決魏州九月己丑磧西節度使杜暹同中書門

下平章事冬十月庚申如汝州廣成湯己巳還東都十

二月丁巳如壽安獵于方秀川壬戌還東都

十五年春正月辛丑涼州都督王君奭及吐蕃戰於青

海敗之夏五月晉州大水癸酉以忠王浚為單于大都

護朔方節度大使諸子慶王潭等俱領州牧刺史都督

節度大使大都護經畧使實不出閏秋七月戊寅冀州

河溢庚寅鄜州之洛水溢

新書止言洛水此據舊書蓋舊書下又云水壞同州則當

是鄜州之洛水也

己亥降都城囚徒以下原之九月丙子吐蕃

寇瓜州執刺史田元獻閏月庚子寇安西副大都護趙

歸貞擊敗之庚申回紇襲甘州王君奩死之朔方節度

使蕭嵩兼判涼州事總兵以禦吐蕃河北饑轉江淮米



百萬石賑之冬十月己卯至自東都十一月丁卯獵于城南十二月乙亥如溫泉宮丙戌至自溫泉宮

十六年春正月春龍等州獠陳行範廣州獠馮仁智何遊魯叛驃騎大將軍楊思勗討平之壬寅趙歸貞及吐蕃戰于曲子城敗之庚申許徒以下囚保任營農三月辛丑免營農囚罪秋七月吐蕃寇瓜州刺史張守珪擊敗之乙巳河西節度使蕭嵩隴右節度使張志亮克吐蕃大莫門城八月己巳張說進開元大衍曆辛卯蕭嵩

遣杜賓客擊吐蕃于祁連城大破之九月丙午以久雨  
降囚罪徒以下原之冬十月己卯如溫泉宮己丑至自  
溫泉宮十一月癸巳蕭嵩為兵部尚書同中書門下平  
章事十二月丁卯如溫泉宮丁丑至自溫泉宮

十七年春二月丁卯駕州都督張審素攻西南蠻克昆  
明城及鹽城三月戊戌張守珪及吐蕃戰于大同軍敗  
之甲寅信安王禕攻拔吐蕃石堡城夏四月癸亥令中  
書門下疏決大理京兆萬年長安等獄囚徒天下囚死

罪降等流以下原之六月甲戌源乾曜杜暹李元絃罷  
蕭嵩兼中書令戶部侍郎宇文融為黃門侍郎兵部侍  
郎裴光庭為中書侍郎並同中書門下平章事秋八月  
癸亥帝以降誕日讌百寮于花萼樓下百寮表請以每  
年八月五日為千秋節令天下諸州讌樂休暇三日從  
之九月壬子貶宇文融為汝州刺史又貶昭州平樂尉  
冬十月戊午朔日有食之十一月庚申享于太廟丙申  
謁橋陵赦奉先縣戊戌謁定陵己亥謁獻陵壬寅謁昭

陵乙巳謁乾陵戊申還宮大赦流移人並放還左降官  
移近處免供頓縣今歲租天下百姓今歲地租之半賜  
文武官階爵十二月辛酉如溫泉宮乙丑校獵渭濱壬  
申至自溫泉宮

十八年春正月辛卯裴光庭為侍中三月辛卯改定州  
縣上中下戶口之數依舊給京官職田夏四月乙卯築  
京城外郭乙丑裴光庭兼吏部尚書五月奚契丹附于  
突厥六月庚申命左右丞相尚書及中書門下五品已

上舉才堪邊任及刺史者丙子忠王浚為河北道行軍  
元帥御史大夫李朝隱京兆尹裴奭先副之率十八總  
管以討奚契丹壬午瀍洛水溢閏月己丑令范安及韓  
朝宗就二水源疏決之秋九月丁巳以忠王浚兼河東  
道諸軍元帥冬十月戊子吐蕃請和庚寅如岐州之鳳  
泉湯癸卯至自鳳泉湯十一月丁卯如溫泉宮丁丑至  
自溫泉宮十二月戊申尚書左丞相燕國公張說薨  
十九年春正月壬戌開府儀同三司霍國公王毛仲貶

灑州別駕中路賜死

考異曰寶錄十八年六月乙丑王毛仲殿灑州按唐厯唐統紀舊紀

毛仲殿皆十九年正月今從之

丙子親耕於興慶宮夏四月丙申令兩

京及天下諸州立太公廟以張良配饗春秋仲月上戊日祭之壬戌五嶽各置老君廟秋八月辛巳降死罪徒己下原之冬十月丙申如東都是冬浚苑內洛水

二十年春正月乙卯信安王禕為河東河北道行軍副

元帥率兵以伐奚契丹二月甲戌朔日有食之

通鑑作癸酉朔分

命宰相錄京城獄繫囚三月信安王禕及奚契丹戰於

幽州之白山敗之夏五月癸卯敕寒食上墓編入五禮  
戊申信安王禕獻奚契丹之俘六月丁丑忠王浚加司  
徒信安王禕加開府儀同三司秋八月辛未朔日有食  
之己卯戶部尚書王暎卒九月乙巳中書令蕭嵩等奏  
上開元新禮一百五十卷制行用之渤海靺鞨寇登州  
刺史韋俊死之左領軍將軍蓋福順發兵伐之冬十月  
壬午如北都丙戌命巡幸所至有賢才未聞達者舉之  
仍令中書門下疏決囚徒辛卯至潞州之飛龍宮給復

三年辛丑至北都癸丑曲赦北都給復三年庚申如汾  
陰十一月庚午祠后土大赦左降官量移近處賜文武  
官階勲爵免供頓州今歲租大酺三日十二月壬申至自  
汾陰

二十一年春正月乙巳祔肅明皇后神主于廟毀儀坤  
廟丁巳如溫泉宮癸亥至自溫泉宮三月乙巳裴光庭  
薨甲寅尚書右丞韓休為黃門侍郎同中書門下平章  
事閏月幽州副總管郭英傑及契丹戰于都山英傑死



之夏四月乙卯遣宣慰使黜陟官吏決繫囚丁巳寧王  
憲為太尉薛王業為司徒慶王潭為太子太師忠王浚  
為開府儀同三司棣王洽為太子少傅鄂王涓為太子  
太保五月戊子以皇太子納妃降死罪流以下原之京  
文武官賜勳一轉秋七月乙丑朔日有食之九月壬午  
封子沔為信王泚義王灌陳王澄豐王德恒王浹涼王滔  
深王冬十月庚戌如溫泉宮己未至自溫泉宮十一月  
戊子尚書右丞相宋璟以年老請致仕許之十二月丁

未蕭嵩韓休罷京兆尹裴耀卿為黃門侍郎前中書侍郎張九齡起復舊官並同中書門下平章事是歲京師饑詔出太倉米二百萬石給之

欽定續通志卷六

欽定四庫全書

欽定續通志卷七

唐紀 七

玄宗二

開元二十二年春正月己巳如東都辛未太府卿嚴挺  
之戶部侍郎裴寬於河南存問賑給乙酉懷衛邢相等  
州乏糧遣中書舍人裴敦復巡問量給種子二月壬寅  
秦州地震給復壓死者家一年三人已上者三年夏四月

甲辰降死罪以下甲寅北庭都護劉渙謀反伏誅五月

戊子裴耀卿為侍中中書侍郎張九齡為中書令黃門

侍郎李林甫為禮部尚書同中書門下平章事是夏帝

於苑中種麥率皇太子已下躬自芟之

謹按通鑑輯覽

御批耕耨已足勸農事必偃儂自芟斯過甚矣且帝既云此

所以薦宗廟則當歲以為常不見其繼此而行也子夏曰

雖小道必有可觀致

遠恐泥蓋謂此耳 六月壬辰幽州節度使張守珪俘奚

契丹以獻

考異曰實錄守珪大破林胡按會要契丹事二十二年大破之蓋實錄以契丹即戰國時

林胡故

云然 秋七月己巳薛王業薨甲申遣中書令張九齡

充河南開稻田使冬十二月戊子朔日有食之乙巳張  
守珪大破契丹斬其王屈烈及其大臣可突干傳首東  
都

二十三年春正月乙亥耕藉田

舊書作己亥然前年十  
二月戊子朔則此不應

是己亥也  
茲從新書大赦賜文武官及朝集採訪使階爵其才有

霸王之畧學究天人之際及堪將帥牧宰者令五品已  
上清官及刺史各舉一人賜酺三日秋七月丙子皇太  
子鴻改名璿慶王直以下十四王並改名又封子琪為

恒王璿涼王璿汴王

按封皇子玘為義王珪為陳王玘為豐王已見于二十一年九月舊

書重出新書並不載封璿璿事亦屬脫誤

八月戊子免鰥寡惻獨今年地稅

之半冬十月戊申突騎施寇北庭及安西撥換城閨十

一月壬午朔日有食之

考異曰舊紀作十一月壬申朔按長歷十一月壬子朔今從實

錄唐

十二月乙亥冊故蜀州司戶楊元琰女為壽王瑁妃

二十四年春正月北庭都護蓋嘉運擊突騎施敗之三月

乙未移考功貢舉于禮部夏五月丙午醴泉人劉志誠

反伏誅秋七月辛丑李林甫為兵部尚書依舊知政事

八月戊申加親舅小功服舅母總麻服堂舅袒免冬十月戊申車駕發東都甲子次華州降所過處繫囚丁丑至自東都十一月壬寅裴耀卿張九齡罷李林甫兼中書令朔方軍節度副大使牛仙客工部尚書同中書門下三品十二月戊申慶王琮為司徒

二十五年春二月乙酉張守珪及契丹戰於捺祿山敗之辛卯河西節度副大使崔希逸及吐蕃戰於青海敗之夏四月辛酉殺監察御史周子諒乙丑廢皇太子瑛



及鄂王瑤光王瑊為庶人皆殺之秋七月庚申封李林甫為晉國公牛仙客為幽國公九月壬申頒新定令式格及事類一百三十卷於天下冬十一月壬申如溫泉宮乙酉至自溫泉宮丁丑開府儀同三司廣平公宋璟薨十二月丙午惠妃武氏薨追諡為貞順皇后葬於敬陵

二十六年春正月乙亥牛仙客為侍中丁丑迎氣於東郊降死罪流以下原之以京兆府新開稻田給貧人賜

百官勲絹天下州縣每鄉一學仍擇師資令其教授諸鄉貢每年令就國子監謁先師明經加口試內外八品已下及草澤有博學文辭之士各委本司本州聞薦壬辰李林甫兼隴右節度副大使二月乙卯牛仙客兼河東節度副大使三月癸未吐蕃寇河西崔希逸敗之夏四月己亥朔始令有司讀時令於宣政殿五月乙酉李林甫兼河西節度副大使六月庚子立忠王璿為皇太子秋七月己巳冊皇太子大赦常赦所不原者咸赦除

之賜文武官子為父後者勲一轉民醜三日九月丙申朔日有食之庚子益州長史王昱及吐蕃戰於安戎城敗績冬十月戊寅如溫泉宮壬辰至自溫泉宮

二十七年春正月壬寅榮王琬巡按隴右二月己巳羣臣上尊號曰開元聖文神武皇帝大赦免百姓今年租賜文武官階爵醜五日夏四月己丑牛仙客為兵部尚書兼侍中李林甫為吏部尚書依舊兼中書令總文武選事秋八月乙亥北庭都護蓋嘉運擊突騎施可汗吐

火仙於碎葉城擒之壬午吐蕃寇邊河西節度使蕭昊敗  
之甲申制追贈孔宣父為文宣王顏回為充國公餘十  
哲皆為侯後嗣褒聖侯改封為文宣公九月皇太子改  
名紹冬十月辛巳改修東都明堂丙戌如溫泉宮十一  
月辛丑至自溫泉宮

二十八年春正月癸巳如溫泉宮庚子至自溫泉宮三  
月丁亥朔日有食之壬子益州長史章仇兼瓊敗吐蕃  
克安戎城夏五月乙未太子少師韓休辛秋七月壬寅

追尊宣皇帝陵名曰建初光皇帝陵名曰啟運仍置官員九月庚寅封皇孫倣等十九人為郡王冬十月甲子如溫泉宮以壽王妃楊氏為道士號太真辛巳至自溫泉宮十一月牛仙客停兼朔方河東節度使

二十九年春正月癸巳如溫泉宮庚子至自溫泉宮立玄元皇帝廟秋七月乙亥北州刺史王斛斯為幽州節度使八月乙未幽州節度副使安祿山為營州都督充平盧軍節度副使押兩番渤海黑水四府經畧使冬十月

丙申如溫泉宮戊戌遣使分往諸道黜陟官吏十一月  
庚戌司空邠王守禮薨辛酉至自溫泉宮辛未太尉寧  
王憲薨諡為讓皇帝葬於惠陵十二月癸未吐蕃陷廓  
州達化縣及振武軍石堡城

天寶元年春正月丁未朔大赦改元常赦所不原者咸  
赦除之免百姓諸色逋稅前資官及白身人有儒學博  
通文辭秀英及軍謀武藝者具以名薦甲寅陳王府參  
軍田同秀上言玄宗皇帝降於丹鳳門通衢告賜靈符

在尹喜之故宅帝遣使就函谷故關尹喜臺西發得之  
乃置玄元廟於大寧坊辛未陝郡鑿三門渠成二月丁  
亥羣臣上尊號曰開元天寶聖文神武皇帝辛卯享玄  
元皇帝於新廟甲午享于太廟丙申合祭天地于南郊  
大赦改侍中為左相中書令為右相東都為東京北都  
為北京天下諸州改為郡刺史為太守賜文武官階爵  
庚子平盧節度使安祿山進階驃騎大將軍秋七月癸  
卯朔日有食之辛未左相牛仙客薨八月丁丑刑部尚

書李適之為左相壬辰右相李林甫加尚書左僕射李  
適之兼兵部尚書左僕射裴耀卿為尚書左僕射九月  
丙寅改玄元廟為太上玄元皇帝宮冬十月丁酉如溫  
泉宮作長生殿成名曰集靈臺以祀天神十一月己巳  
至自溫泉宮十二月朔方節度使王忠嗣及奚戰於桑  
乾河敗之

二年春正月乙卯作昇仙宮丙辰追尊玄元皇帝為大  
聖祖玄元皇帝三月壬子享于玄元宮追號大聖祖父



周上御大夫敬曰先天太上皇母益壽氏號先天太  
后尊欲繇曰明德皇帝涼武昭王曰興聖皇帝江淮租  
庸等使韋堅引漕水開廣濟潭以聚運船丙寅帝幸廣  
運樓以觀之秋七月丙辰裴耀卿薨冬十月戊辰太子  
太保信安王禕卒戊寅如溫泉宮十一月乙卯至自

溫泉宮

考異曰舊紀十月戊寅幸溫泉宮十一月乙卯還宮與寶錄同十二月戊申又幸溫泉宮

丙辰還宮寶錄無按十二月丙寅朔無戊申丙辰唐  
歷十一月戊申幸溫泉宮丙辰還宮又與寶錄本紀

不同今  
皆不取

三載春正月丙申朔改年曰載赦見禁囚徒壬寅如溫  
泉宮二月己巳至自溫泉宮丁丑封讓皇帝男琳為嗣  
寧王邠王守禮男承寧為嗣邠王讓皇帝男璿為嗣申  
王惠宣太子男珍為嗣岐王瑒為嗣薛王庚寅皇太子  
紹改名亨三月己巳安祿山蕪范陽節度使庚午武威  
郡上言番禾縣天寶山有醴泉湧出嶺石化為瑞麩遠  
近貧乏者取以給食癸酉降死罪流已下原之秋八月  
丙午九姓拔悉密葉護攻殺突厥烏蘇米施可汗來獻

其首冬十月癸巳如溫泉宮十一月丁卯至自溫泉宮  
十二月甲寅祠九宮貴神於東郊大赦納女道士楊太

真於宮中

四載春正月丙戌王忠嗣及突厥戰於薩河內山敗之  
秋八月壬寅冊楊太真為貴妃九月隴右節度使皇甫

惟明與吐蕃戰於石堡城副將褚誨死之

按舊書作褚直廉直廉切

即誨字也冬十月丁酉如溫泉宮十二月戊戌至自溫泉宮

五載春正月癸酉刑部尚書韋堅貶縉雲太守隴右節

度使皇甫惟明貶播川太守以王忠嗣為河西隴右節  
度使兼朔方河東軍事三月丙子遣使黜陟官吏夏四  
月庚寅李適之罷丁酉門下侍郎陳希烈同中書門下  
平章事五月壬子朔日有食之秋七月丙子韋堅為李  
林甫所搆配流臨封郡賜死堅妹皇太子妃聽離太子  
少保李適之貶宜春太守到官飲藥死八月戶部侍郎  
郭虛已為御史大夫劔南節度使九月壬子刻石為李  
林甫陳希烈像於太清宮冬十月丁酉如溫泉宮十一

月己巳至自溫泉宮十二月辛未殺贊善大夫杜有隣  
著作郎王曾左驍衛兵曹柳勳等

六載春正月辛巳殺北海太守李邕淄川太守裴敦復  
丁亥享於太廟戊子有事於南郊大赦於京城置三皇  
五帝廟其章懷節愍惠莊惠文惠宣等太子與隱太子  
懿德太子同為一廟三月甲辰陳希烈為左相乙酉以  
旱命宰相臺寺府縣慮囚冬十月戊申如溫泉宮改為  
華清宮十一月乙亥殺戶部侍郎楊慎矜及其兄少府

少監慎餘弟洛陽令慎名十二月癸亥至自華清宮

七載春三月乙酉大同殿柱產玉芝有神光照殿羣臣

請加皇帝尊號曰開元天寶聖文神武應道許之夏四

月辛丑以高力士為驃騎大將軍五月壬午帝御興慶

宮受冊徽號大赦免百姓來載租庸賜酺三日六月范

陽節度使安祿山賜實封及鐵券秋八月己亥朔改千

秋節為天長節冬十月庚戌如華清宮封貴妃姊二人

為韓國號國夫人

按揚貴妃傳封韓號泰三國夫人國  
志傳亦同舊書無泰國新書不載

十二月戊戌或言玄元皇帝見于華清宮之朝元閣乃  
改為降聖閣會昌縣為昭應縣會昌山為昭應山辛酉至  
自華清宮

八載夏四月殺咸寧太守趙奉璋李林甫陷之也六月  
大同殿又產玉芝隴右節度使哥舒翰攻吐蕃石堡城  
拔之閏月丙寅謁太清宮加上玄元皇帝尊號為聖祖  
大道玄元皇帝高祖太宗高宗中宗睿宗五帝皆加大  
聖皇帝之字太穆文德則天和思昭皇后皆加順聖皇

后之字羣臣上皇帝尊號曰開元天地大寶聖文神武

應道皇帝

按七載五月已上尊號曰開元天寶聖文神武應道皇帝舊書新書並同至此復加二字

而舊書于此仍前文而無所加應屬脫誤

大赦戊辰太子太師徐國公蕭嵩

薨冬十月丙寅如華清宮十一月丁巳幸御史中丞楊

釗莊

九載春正月己亥至自華清宮丁巳詔以十一月封西嶽

三月辛亥西嶽廟災以久旱停封西嶽夏五月庚寅慮

囚乙卯安祿山進封東平郡王秋九月辛卯以商周漢



為三恪廢韓介鄴公冬十月庚申如華清宮辛卯幸揚  
國忠亭子十二月乙亥至自華清宮

十載春正月壬辰朝獻于太清宮癸巳享于太廟甲午  
有事于南郊大赦酺三日丁酉李林甫兼安北副大都  
護朔方節度使二月丁巳安祿山兼河東節度使夏四  
月壬午劔南節度使鮮于仲通及雲南蠻閣羅鳳戰于  
瀘川大敗大將王天運死之五月丁亥改諸衛幡旗緋  
色者為赤黃以符土運冬十月壬子如華清宮十一月

乙未幸揚國忠宅丙午兵部侍郎兼御史中丞揚國忠  
兼領劔南節度使

十一載春正月丁亥至自華清宮二月庚午突厥寇邊  
三月安祿山伐契丹其副阿布思叛歸漠北祿山頓兵  
不進夏四月戶部郎中王鐸京兆人邢綽謀反伏誅丙  
戌殺御史大夫兼京兆尹王鉷以揚國忠兼京兆尹六  
月壬午揚國忠奏劔南兵敗吐蕃于雲南揚國忠奏有  
鳳皇見冬十月戊寅如華清宮十一月乙卯李林甫薨

庚申楊國忠為右相兼文部尚書十二月甲申以平盧兵馬使史思明兼北平太守充盧龍軍使丁亥至自華清宮

十二載春二月癸未追削李林甫官爵夏五月己酉復魏周隋三恪隴右節度使哥舒翰伐吐蕃克洪濟大莫門城秋八月戊戌哥舒翰封西平郡王冬十月戊寅如華清宮

十三載春正月己亥安祿山入朝加左僕射丙午至自

華清宮二月壬申朝獻于太清宮加上元皇帝號曰  
大聖祖高上大道金闕元天皇帝癸酉享于太廟  
增祖宗諡甲戌羣臣上尊號曰開元天地大寶聖文神  
武證道孝德皇帝大赦左降官遭父母喪者聽歸賜內  
外官階爵民酺三日丁丑揚國忠為司空三月哥舒翰  
伐吐蕃敗之復河源九曲夏五月北庭都護程千里俘  
阿布思以獻六月乙丑朔日有食之劔南留後李宓及  
雲南蠻戰於西洱河死之

洪邁曰天寶十三載李宓擊南詔糧盡引還蠻追擊之宓

被擒全軍皆沒國忠隱其事更以提聞此通鑑所紀舊唐書云李宓糧盡軍旋為所擒新書亦云敗死于西洱河予按高適有李宓征蠻詩序云天寶十一載詔伐西南夷丞相揚公兼節制之寄乃秦前雲南太守李宓自交趾擊之往復數萬里十二載四月至于長安君子是以知廟堂使能而李公効節因賦是詩其畧曰餉道忽已遠縣軍垂欲窮野食掘田鼠晡餐兼焚僮收兵列亭候拓地彌西東歸來長安道臺見甘泉宮其所述如此雖詩人所言未必皆實然當時明賦其事不應虛言則宓蓋歸至長安未嘗敗死其年又非十三載也味掘鼠餐僮之語則糧盡危急師非勝歸明甚按高適所云在十二載或者李宓于十二載先得生還至十三載復率兵伐蠻全軍皆沒而紀

秋八月丙戌陳希烈罷文部

事者止據後事書之歟

侍郎韋見素為武部尚書同中書門下平章事是秋霖

雨人多乏食出太倉米一百萬石賤糶以濟之瀝洛水  
溢冬十月乙酉如華清宮戊午至自華清宮是載戶部  
計見管府三百二十一縣一千五百三十八戶九百六  
十一萬九千二百五十四口五千二百八十八萬四百  
八十八

十四載春三月丙寅宴羣臣於勤政樓奏九部樂辛巳  
遣使宣慰河北夏四月安祿山奏破奚契丹秋八月辛  
卯免百姓今載租庸壬辰慮囚冬十月庚寅如華清宮

十一月甲子范陽節度使安祿山率蕃漢之兵十餘萬自幽州南向詣闕以誅揚國忠為名殺太原尹楊光翹庚午聞於行在所壬申伊西節度使封常清為范陽平盧節度使以討安祿山丙子至自華清宮九原郡太守郭子儀為朔方軍節度副大使右羽林軍大將軍王承業為太原尹衛尉卿張介然為河南節度採訪使右金吾大將軍程千里為上黨郡長史並令討賊丁丑以京兆牧榮王琬為東討元帥高仙芝副之十二月丁亥祿山

陷靈昌郡渡河辛卯陷陳留郡執太守郭納張介然死  
之癸巳陷滎陽郡太守崔無訛死之丙申封常清及安  
祿山戰于睨子谷敗績丁酉祿山陷東京河南尹達奚  
珣叛降于祿山留守李愷中丞盧奕判官蔣清死之高  
仙芝棄陝郡西保潼關常山太守顏杲卿與長史袁履  
謙賈深等殺祿山將李欽湊執何千年高邈送于京師  
辛丑詔皇太子統兵東討以永王璘為山南節度使江  
陵長史源洧副之潁王璩為劔南節度使蜀郡長史崔



圓副之二王不出閣丙午斬封常清高仙芝于潼關以  
哥舒翰為兵馬副元帥守潼關甲辰郭子儀及祿山將  
高秀巖戰于河曲敗之戊申榮王琬薨濟南太守李隨  
單父尉賈賁平原太守顏真卿饒陽太守慮全誠並起  
兵討祿山

十五載春正月乙卯東平太守嗣吳王祗以兵討安祿  
山其日祿山僭號於東京丙辰以李隨為河南節度使  
庚申李光弼為河東節度使壬戌安祿山陷恒山執顏

杲卿表履謙癸亥哥舒翰進尚書左僕射同中書門下  
平章事南陽太守魯炁為南陽節度使乙丑安慶緒寇  
潼關哥舒翰擊敗之丁丑真源令張巡以兵討安祿山  
二月己亥李光弼郭子儀將兵東出井陘與祿山將史  
思明戰大破之庚子賈贲戰于雍丘死之三月壬午以  
河東節度使李光弼為范陽節度使顏真卿充魏郡以  
真卿為河北採訪使夏四月丙午贊善大夫來瑱為潁  
川太守兼招討使五月戊午魯炁及祿山將武令珣戰

于洩水敗績賊寇南陽嗣虢王巨為河南節度使自藍田出師救南陽六月癸未顏真卿及祿山將袁知泰戰於堂邑敗之北海太守賀蘭進明克信都丙戌哥舒翰及祿山將崔乾祐戰于靈寶西原敗績是日李光弼及史思明戰于嘉山大敗之辛卯蕃將火拔歸仁執哥舒翰叛降于祿山遂陷潼關及河東華陰上洛郡甲午詔親征乙未黎明出延秋門西行宰相楊國忠韋見素內侍高力士及太子親王妃主皇孫扈從其妃主皇孫之

在外者皆委之而去丁酉次于馬嵬揚國忠為禁軍所

殺貴妃揚氏賜死

謹按通鑑輯覽

御批綱目書揚國忠及貴妃伏誅說者謂二人之罪宜誅書法所以正名定罪殊不知是時象叛親離威柄不出玄宗且玄宗亦無誅之之意安得謂之伏法惟據事直書則罪名既著而元禮嗾眾劫君之惡亦自彰杜甫一生忠懇獨于北征詩褒美元禮太過不可為訓且彼時玄宗顛沛流離揚氏又安能更為人忠哉若謂宜誅則當於祿山未叛揚氏方盛之時捨身固爭方可謂之忠臣元禮所為正韓愈所謂天下石馬者在朋友尚不可而况君臣乎若元禮者直亂臣賊子其去祿山蓋一間耳

以韋見素子京兆府司錄諤為御史中

丞充置頓使然未知所適軍士或言河隴或言靈武太

原或言還京為便韋諤曰還京須有捍賊之備兵馬未  
集恐非萬全不如且幸扶風徐圖所向帝詢于眾咸以  
為然及行百姓遮路乞留皇太子願戮力破賊收復京  
城因留太子已亥次扶風郡軍士各懷去就會益州貢  
春綵至帝悉命置于庭召諸將諭之曰卿等多國家功  
臣陳力久矣朕之優獎常亦不輕逆胡背恩事須迴避  
甚知卿等不得別父母妻子朕亦不及親辭九廟言發  
涕流又曰朕須幸蜀路險狹人多恐難供承今有此綵

卿等即宜分取各圖去就朕自有子弟中官相隨便與卿等訣別衆咸俯伏涕泣曰死生願從陛下帝曰去住任卿自此悖亂之言稍息己亥祿山陷京師庚子以司勳郎中劔南節度留後崔圓為蜀郡長史劔南節度副大使潁王璩為劔南節度大使監察御史宋若思為御史中丞充置頓使韋諤充巡關道使並令先發辛丑次陳倉壬寅次散關分部下為六軍潁王璩先行壽王瑁等分統六軍前後左右相次丙午次河池郡崔圓奏劔

南歲稔民安儲供無闕帝大悅授圓中書侍郎同中書  
門下平章事蜀郡長史劔南節度如故秋七月甲子次  
普安郡憲部侍郎房琯自後至以為文部尚書同中書  
門下平章事丁卯詔以皇太子充天下兵馬元帥都統  
朔方河東河北平盧等節度使永王璘江陵府大都督  
統山南東路黔中江南西路等節度大使盛王琦廣陵  
郡都督統江南東路淮南河南等路節度大使豐王珙  
武威郡都督領河西隴右安西北庭等路節度大使庾

午次巴西郡以太守崔渙為門下侍郎同中書門下平章事韋見素為左相庚辰車駕至蜀郡八月壬午大赦皇太子即皇帝位于靈武癸巳以聞丁酉帝用靈武冊稱上皇詔曰誥庚子上皇臨軒冊肅宗遣韋見素房瑄使于靈武授冊命明年九月郭子儀收復兩京十月肅宗遣中使啖廷瑤入蜀奉迎上皇丁卯上皇發蜀郡十一月丙申次鳳翔郡肅宗遣精騎三千至扶風迎衛十二月丙午肅宗具法駕至咸陽望賢驛奉迎上皇御宮



之南樓肅宗拜于樓下嗚咽不自勝上皇啟行肅宗  
騎馬前導丁未至京師御大明宮之含元殿見百寮上  
皇親自撫問人人感咽時太廟為賊所焚摧移神主於  
大內長安殿上皇謁廟請罪遂幸興慶宮三載肅宗奉  
上尊號曰太上天道聖皇帝上元元年七月徙居于西  
內之甘露殿元年建巳月甲寅崩于神龍殿年七十八  
按上元二年九月詔去上元號稱元年以十一月為歲  
首至次年四月改元年為寶應元年復以正月為歲首  
故新書云元年建巳月也而舊書云上元二年四月崩  
于神龍殿玄宗生于垂拱元年是年乙酉至寶應元年

壬寅年七十八舊  
書云上元二年撰  
諡曰至道大聖大明孝皇帝廟號女

宗陵曰泰陵

玄宗開元二十九年天寶十五載凡四十四年



欽定續通志卷七

欽定四庫全書

史部

欽定續通志卷八

九八

主事臣尹壯圖覆勘

總校官原任侍講臣王燕緒

欽定四庫全書

欽定續通志卷八

唐紀八

肅宗

肅宗皇帝諱亨玄宗第三子也母曰元獻皇后楊氏初

名嗣昇封陝王開元四年為安西大都護

按舊書云二歲封陝王五

歲拜安西大都護肅宗以景雲三年生至開元四年當是六歲幼性仁孝玄宗尤愛之

十五年徙封忠王改名浚

玄宗紀在十三年

為朔方節度大使

單于大都護十八年奚契丹寇邊為河北道行軍元帥  
信安王禕為副帥御史大夫李朝隱京兆尹裴奩先等  
八總管兵以伐之命百寮設次於光順門與肅宗相見  
左丞相張說退謂學士孫逖韋述曰嘗見太宗寫真圖  
忠王英姿穎發儀表非常雅類聖祖此社稷之福也朝  
隱等大破奚契丹于范陽北肅宗以遙統之功加司徒  
二十三年又更名璵二十五年皇太子瑛廢死明年立  
為皇太子有司行冊禮其儀有中嚴外辨其服絳紗太

子曰此天子禮也公卿議請改外辦為外備絳紗為朱明服從之二十八年更名紹天寶十三載又更令名安祿山來朝太子識其有反相請以事誅之玄宗不聽祿山反制太子監國仍遣總諸軍進討時祿山以誅楊國忠為名軍民切齒於楊氏國忠懼與貴妃謀間其事乃不果行十五載六月玄宗避賊行至馬嵬父老皆遮道請留玄宗為之按轡久之乃令太子於後宣慰父老父老因請留太子討賊太子不可父老共擁太子馬不得

行太子乃使馳白玄宗玄宗曰天也乃分後軍二千人及飛龍廢馬從太子且諭將士曰太子仁孝可奉宗廟汝曹善輔佐之又諭太子曰汝勉之勿以吾為念西北諸蕃吾撫之素厚汝必得其用太子南向號泣而已又使送東宮內人於太子且宣旨欲傳位太子太子不受太子既留至渭北便橋橋已絕募水濱居民得三千餘人從淺處涉後軍多沒者又遇潼關散卒誤與之戰死傷甚衆時從者惟廣平建寧二王及四軍將士纔二千



人自奉天而北夕次永壽百姓稍持牛酒來獻新平太守薛羽保定太守徐毅聞賊且至皆棄郡走戍太子至新平時晝夜奔馳三百餘里士衆器械亡失過半所存之衆不過一旅己亥至保定捕得羽毅斬之庚子至烏氏驛彭原太守李遵率兵奉迎仍進衣服糧糗至彭原又募得甲士四百率私馬以助軍辛丑至平涼得牧馬數萬匹兵始振戍申扶風民康景龍等殺賊所署宣慰使薛總陳倉令薛景仙克復扶風郡民間相傳太子

北收兵來取長安民日夜望之或時相驚曰太子大軍  
至矣則皆走市里為空賊望見北方塵起輒驚欲走京  
輔豪傑往往殺賊官吏遙應官軍誅而復起賊不能制  
太子在平涼朔方留後杜鴻漸魏少遊崔漪裴冕李涵  
等迎太子治兵於朔方庚戌次豐寧見大河之險欲保  
豐寧會天大風乃迴趨靈武七月辛酉裴冕等請太子

即皇帝位甲子皇太子即皇帝位於靈武

謹按通鑑輯覽

御批馬嵬之命肅宗固再三辭避矣茲靈武之自行即位出  
於何典且靈武距劍南為時不過兩月不聞馳一介奏告

故范祖禹直斥為乘危  
叛父持議嚴且正矣

尊皇帝曰上皇天帝遣使奏其事

於上皇大赦改元至德賜文武官階爵以御史中丞裴  
冕為中書侍郎同中書門下平章事河西兵馬使周昉  
為河西節度使隴右兵馬使彭元暉為隴右節度使前  
蒲州刺史呂崇賁為關內節度使丁邠祿山害霍國長  
公主永王妃侯莫陳氏義王妃閻氏陳王妃章氏信王  
妃任氏駙馬楊拙等八十餘人於崇仁之街甲戌祿山  
寇扶風太守薛景仙敗之賊黨同羅部五千餘人自西

出降朔方軍已卯京兆尹崔光遠長安令蘇震等率官  
吏大呼於西市殺賊數千人來赴行在詔改扶風為鳳  
翔郡八月壬午朔方節度使郭子儀范陽節度使李光  
弼破賊於常山郡之嘉山帝以治兵收京城詔子儀等  
旋師子儀光弼率所統步騎五萬至屯河北以子儀為  
兵部尚書依前靈州大都督府長史光弼為戶部尚書  
兼太原尹北京留守同中書門下平章事

按考異嘉山之捷在六月

舊紀八月壬午乃拜官日因言已前事耳回紇吐蕃遣使繼至請助國討賊

是日上皇在成都大赦癸巳上所奉表達成都丁酉上  
皇遣使奉冊赴靈武九月壬辰帝如彭原封故邠王守  
禮男承家為燉煌王令使回紇和親丙子至順化章見  
素房瑄崔渙等自蜀賫上冊書及傳國寶等至十月辛  
巳朔日有食之癸未以軍興用不足始鬻爵度僧尼以  
房瑄為兵馬元帥令收復兩京兵部尚書王思禮副之  
分為三軍楊希文劉貴哲李光進等各將一軍其衆五  
萬辛丑瑄與祿山將安守忠戰于陳濤斜敗績再戰又

敗楊希文劉貴哲等降於賊瑄亦奔還平原太守顏真卿以食盡援絕棄城渡河於是河北郡縣盡陷於賊十一月戊子回紇引軍來赴難與郭子儀同破賊黨同羅部三千餘衆於河上詔崔渙巡撫江南補授官吏十二月戊子以王思禮為闕內節度使給復彭原二載以秦州都督郭英乂為鳳翔太守諫議大夫高適為淮南節度使安祿山臨潁川執太守薛愿長史龐堅甲辰永王璘擅以舟師下廣陵

按新書在十月通鑑云十二月甲辰永王璘擅引兵東巡沿江而下

軍容甚盛然猶未露割據之謀吳郡太守李希言平牒  
璘詰其擅兵東下之意璘怒遣其將渾惟明襲吳郡李  
廣琛襲廣陵璘進至當塗希言遣其將元景曜及丹徒  
太守閻敬之將兵拒之璘擊斬敬之以徇與舊書同新  
書玄宗紀亦在十二月  
甲辰肅宗紀在十月誤

二載春正月庚戌朔帝在彭原受朝賀是日通表入蜀  
賀上皇永王璘陷鄱陽郡上皇以憲部尚書李麟同中  
書門下平章事遣崔圓奉誥赴彭原乙卯安祿山為其  
子慶緒所殺甲子如保定丙寅河西兵馬使蓋庭倫殺  
其節度使周佖以叛判官崔稱討誅之是日蜀郡健兒

賈秀等反將軍席元慶等討誅之二月戊子次于鳳翔  
李光弼及安慶緒之衆戰于太原敗之郭子儀大破崔  
乾祐於潼關收河東郡永王璘伏誅三月辛酉韋見素  
裴冕罷以前憲部尚書苗晉卿為左相癸酉以久雨詔  
疏理刑獄夏四月戊寅以郭子儀為司空兼副元帥統  
諸節度李光弼為司徒五月癸丑郭子儀及慶緒將安  
守忠戰於清渠敗績子儀退保武功丁巳房琯罷以諫  
議大夫張鎬為中書侍郎同中書門下平章事武部侍



郎杜鴻漸為河西節度使甲子郭子儀以失律讓司空秋  
七月庚戌蜀郡軍士郭千仞反節度使李岷討誅之丁  
巳安慶緒陷陝郡八月甲申崔渙罷張鎬兼河南節度  
使靈昌太守許叔冀奔於彭城癸巳大閱閏月丁卯廣  
平王俶為天下兵馬元帥郭子儀副之辛未安慶緒將  
寇鳳翔崔光遠及行軍司馬王伯倫判官李椿率眾攻  
中渭北殺賊守橋者千人乘勝至苑門賊有先屯武攻  
者聞之燒營而遁與官軍遇戰于苑北伯倫死之九月

丁丑慶緒臨上黨執節度使程千里燉煌王承寀自回  
紇使還拜宗正卿納回紇公主為妃回紇封為葉護持  
四節與回紇葉護太子率兵助國討賊丁亥元帥廣平  
王統朔方安西回紇南蠻大食之衆二十萬東向討賊  
壬寅與賊將安守忠李歸仁等戰于香積寺大敗之賊  
帥張通儒等棄京城走癸卯復京師甲辰捷書至行在  
即日告捷于上皇遣尚書左僕射裴冕啓告郊廟社稷  
冬十月乙巳朔以崔光遠為京兆尹癸丑賊將尹子奇

臨睢陽張巡姚閻許遠死之賊悉衆保陝郡廣平王與  
戰于陝西之新店大敗之庚申安慶緒走奔河北壬戌  
廣平王入東京癸亥帝自鳳翔還京遣太子太師韋見  
素迎上皇于蜀郡給復鳳翔五載丙寅至望賢宮東京  
捷書至丁卯入長安士庶涕泣拜忭曰不圖復見吾君  
帝亦為之感惻九廟為賊所焚帝素服哭於廟三日入  
居大明宮回紇葉護自東京還便辭還蕃乃封葉護為  
忠義王約每年送絹二萬匹十一月丙子張鎬率四鎮

伊西北庭行營兵馬使李嗣業等克復河南郡縣庚子  
作九廟神主告享于長樂殿十二月丙午上皇至自蜀郡  
百寮班於含元殿庭上皇御殿左相苗晉卿率百官稱  
賀禮畢上皇詣長樂殿謁九廟神主即日幸興慶宮帝  
請歸東宮上皇遣高力士再三慰譬而止甲寅苗晉卿  
為中書侍郎同中書門下平章事戊午帝下制大赦凡  
蜀郡靈武元從功臣太子太師幽國公韋見素內侍齊  
國公高力士右龍武大將軍陳元禮等各加實封右僕

射裴冕冀國公殿中監李輔國成國公宗正卿李遵鄭  
國公兼進封邑廣平王俶進封楚王左僕射朔方節度使  
郭子儀加司徒進封代國公兵馬使僕固懷恩封豐國  
公右金吾將軍李嗣業封魏國公司徒兼太原尹李光  
弼薊國公關內節度使王思禮霍國公淮南節度使來  
瑱潁國公南陽太守魯炆岐國公並加實封京兆尹崔  
光遠鄴國公開府李光進范陽郡公左相苗晉卿為侍  
中封韓國公憲部尚書平章事李麟襄國公中書侍郎

崔圓為中書令趙國公中書侍郎張鎬南陽縣公其李  
愷盧奕顏杲卿袁履謙許遠張巡張介然蔣清龐堅等  
即與追贈訪其子孫厚以官爵賜文武官階爵民酺五

日進封子南陽郡王係為趙王新城郡王僅彭城王潁  
川郡王憊兗王東陽郡王佺涇王橫封襄王倓杞王召

興王偲召王侗定王

按肅宗諸子傳越王係玄宗末年  
王南陽郡至德二載十二月進王

趙乾元三年徙王越涇王佺始王東陽進王涇襄王橫  
至德二載與杞王倓召王偲興王召定王侗同封舊書  
進封南陽王傑為趙王佺為始封不著東陽郡  
倓封襄王偲封杞王又無襄王橫多有脫誤

甲子上

皇御宣政殿授帝傳國璽帝於殿下涕泣而受之乙丑賊將偽范陽節度使史思明與偽河東節度使高秀巖以其兵降庚午斬降賊官達奚珣等一十八人賜陳希烈等七人自盡前大理卿張均特免死配流合浦郡

乾元元年春正月戊寅上皇御宣政殿冊皇帝尊號曰

光天文武大聖孝感皇帝

從舊紀纂輯

帝以徽號中有大聖

二字上表固讓不允乙酉出宮女三千人庚寅大閱庚

子冊良娣張氏為淑妃二月癸卯賊將能元皓以淄青降以元皓為河北招討使乙巳上上皇冊號曰太上至道聖皇天帝丁未大赦改元復以載為年成都靈武扈從三品已上與一子官五品已下一子出身六品已下叙進之免陷賊州三歲稅三月甲戌徙封俶為成王戊寅立淑妃張氏為皇后夏四月癸卯以嗣虢王巨為東京留守河南尹充京畿採訪處置使辛亥祔神主于太廟甲寅朝享于太廟有事於南郊乙卯大赦史思明殺



范陽節度副使烏承恩以反五月戊子張鎬罷庚寅立  
成王俶為皇太子乙未崔圓李麟罷太常卿王璵為中  
書侍郎同中書門下平章事六月己酉初置太一神壇  
於圓丘東命宰相王璵攝行祠事秋七月丙戌初鑄新  
錢文曰乾元重寶用一當十八月壬寅以青徐等五州  
節度使李廣琛兼許州刺史河南節度使崔光遠兼汴  
州刺史青州刺史許叔冀兼滑州刺史充青滑六州節  
度使

考異曰按青州豈可屬兩節度又廣琛先為荊州  
長史今年五月為右常侍九月討安慶緒時實錄

稱鄭蔡節度使汾陽家傳稱淮西荆澧舊紀甲辰加朔  
稱荆未嘗鎮青徐實錄于此稱青徐恐誤也

方節度使郭子儀中書令河東節度使李光弼

侍中關內節度使王思禮兵部尚書九月庚午右羽

林大將軍趙泚為蒲同虢三州節度使貝州刺史能元

皓為齊兗鄆等州防禦使庚寅郭子儀李光弼王思禮

及淮西節度使魯吳興平軍節度使李奐滑濮節度使

許叔冀平盧兵馬使董秦北庭行營節度使李嗣業鄭

蔡節度使季廣琛合兵以討安慶緒於相州以宦官魚

朝恩為觀軍容使

謹按通鑑輯覽

御批易言師貞丈人吉列鎮在軍無帥何以敵懷肅宗即以郭李元勳難相統攝何難使子儀光弼分道進取乃專委宦者反居二人之上與尸失律理固不與九節度相州之潰又誰咎耶 癸巳大食波斯寇廣

州冬十月乙未以濮州刺史張方須為廣州都督五府節度使郭子儀奏破賊十萬於衛州獲安慶緒之弟慶和進收衛州十一月壬申王思禮及安慶緒戰於相州敗之丁丑郭子儀收魏州十二月癸卯以河南節度使崔光遠為魏州刺史甲辰以昇州刺史章黃裳為浙西

節度使庚戌以戶部尚書李峘充淮南浙西節度使王師圍相州慶緒食盡求救於史思明思明率衆來援丁卯思明復陷魏州

二年春正月己巳朔羣臣上尊號曰乾元大聖光天文武孝感皇帝是日史思明自稱燕王於魏州丁丑祠九宮貴神戊寅耕藉田己丑以御史中丞崔寓都統浙江淮南節度處置使丙申李嗣業卒于行營庚子以太子少師崔圓充東京留守判尚書省事二月壬戌遣侍中

苗晉卿王璵慮囚三月己巳皇后親蠶壬申相州行營  
九節度之師潰于滏水郭子儀斷河陽橋以餘衆保東  
京史思明殺安慶緒以衛尉卿荔非元慶為懷州刺史  
權鎮西北庭行營節度使滑州刺史許叔冀充滑汴曹  
宋等州節度使鄆州刺史尚衡為徐州刺史充亳潁等  
州節度使甲午兵部侍郎呂諲同中書門下平章事乙  
未苗晉卿王璵罷京兆尹李峴為吏部尚書禮部侍郎  
李揆為中書侍郎及戶部侍郎第五琦並同中書門下

平章事丙申以郭子儀為東畿山東河東等道節度防禦兵馬元帥權東京留守判尚書省事以河西節度副使來瑱為統華節度潼關防禦團練等使夏四月庚子王思禮及史思明戰於直千嶺敗之壬寅詔減常膳及服御文武五品已上正官各舉賢良方正直言極諫一人兩省官十日一上封事甲辰以鄧州刺史魯吳為鄭州刺史充陳鄭潁亳節度使徐州刺史尚衡為青淄密登萊沂海等州節度使商州刺史興平軍節度使李真

兼豫許汝等州節度使乙巳史思明僭號於魏州癸亥  
以久旱徙市雩祈雨五月辛巳貶李峴為蜀州刺史六  
月乙未以右僕射裴冕為成都尹持節充劍南節度副  
大使饒州刺史顏真卿為浙江西道節度使明州刺史  
呂延之為浙江東道節度使以右羽林大將軍彭元曜  
為陳鄭申光壽等州節度使秋七月乙丑朔禮部尚書  
韋陟充東京留守太子少傅充國公李麟卒辛巳以趙  
王係為天下兵馬元帥李光弼副之丁亥以潞沁節度

使王思禮兼太原尹充北京留守河東節度副大使刑部尚書王璵為蒲同絳三州節度使辛卯呂諲罷八月乙巳襄州偏將康楚元逐其刺史王政副元帥李光弼兼幽州大都督府長史河北節度等使九月甲午康楚元陷荊州戊辰新鑄大錢文如乾元重寶而重其輪用一當五十丁亥以太子少保崔光遠充荆襄招討使右羽林大將軍王仲昇充申安沔等州節度使右羽林將軍李抱真為鄭陳潁亳四州節度使庚寅史思明陷東



京及齊汝鄭滑等州冬十月乙巳李光弼及史思明戰于河陽敗之壬戌呂諲起復十一月庚午敗第五琦為忠州刺史十二月乙巳康楚元伏誅史思明寇陝州神策軍將衛伯玉敗之甲寅以御史大夫史翹為山南東道節度使

上元元年春正月辛巳李光弼進位太尉兼中書令餘如故以杭州刺史侯令儀為浙江西道節度兼江寧軍使戊子朔方節度使郭子儀兼邠寧廊坊兩道節度使

二月癸巳以右丞崔寓為蒲同晉絳等州節度使庚戌  
第五琦除名長流夷州癸丑以太子少保崔光遠為鳳  
翔尹秦隴節度使三月壬申京兆尹李若幽為成都  
尹劍南節度使夏四月甲午李光弼奏破賊於河陽  
戊申襄州部將張惟瑾反殺其節度使史勰戊午以右  
丞蕭華為河中尹充同晉絳等州節度使己未以來瑱  
為山南東道節度使庚申以右羽林大將軍郭英乂為  
陝西節度潼關防禦等使閏月甲子制彭王儼充河西

節度大使兗王儻北庭節度大使涇王儔隴右節度大

使杞王倓陝西節度大使興王侶鳳翔節度大使蜀王

傀邠寧節度大使並不出閤

考證曰肅宗諸子無名傀封蜀王者疑召王儁之誤

按代宗諸子傳蜀王邈大歷十四年始王考通鑑大歷十四年五月德宗即位立王弟傀為蜀王建中二年十一月蜀王傀更名遂三年正月蜀王遂更名邈則蜀王傀乃代宗之子且在大歷年始封此時安得有蜀王傀舊書之誤無疑又按肅宗諸子傳召王儁不言為邠寧節度彭王儉傳云史思明陷河洛羣臣請以諸王臨統方鎮兵遙相維繫于是詔僅充河西節度兗王北庭涇王隴右杞王陝西興王鳳翔並為大使亦不言召王儁為邠寧節

度考證亦誤

丁邠太原尹王思禮進位司空甲戌徙封

趙王係為越王已卯大赦改元賜文武官爵追封太公  
望為武成王張惟瑾降五月丙午太子太傅苗晉卿為  
侍中壬子呂諲罷癸丑以河南尹劉晏為戶部侍郎勾  
當度支鑄錢鹽鐵等使六月乙丑詔先鑄重稜錢一當  
五十宜減當三十開元宜一當十李光弼及史思明戰  
於懷州敗之秋七月丁未上皇自興慶宮移居西內丙  
辰開府高力士配流巫州內侍王承恩播州魏悅漆州  
左龍武大將軍陳元禮致仕八月丁丑以太子賓客呂

謹為荆澧朗硤忠五州節度使己卯以將作監王昂為  
河中尹晉絳等州節度使冬十月壬申以廬州刺史趙  
良弼為浙江東道節度使青州刺史殷仲卿為淄沂滄  
德棣等州節度使甲申以兵部侍郎尚衡為青登等州  
節度使十一月甲午揚州長史劉展反陷潤州昇州十  
二月庚辰以右羽林大將軍李鼎為鳳翔尹興鳳隴等  
州節度使是歲吐蕃陷廓州

二年春正月辛卯温州刺史季廣琛為浙江西道節度

使甲寅降死罪流己下原之乙卯劉展伏誅二月己未  
党項寇寶雞入散關陷鳳州刺史蕭愷死之鳳翔尹李  
昂敗之癸亥以鳳翔尹崔光遠為成都尹劔南節度使  
太子詹事崔圓為淮南節度使戊寅李光弼及史思明  
戰于北邙敗績思明陷河陽癸未貶李揆為袁州長史  
以前河中尹蕭華為中書侍郎同平章事三月甲午史  
朝義寇陝州衛伯玉擊敗之戊戌史思明為其子朝義  
所殺李光弼以失律讓太尉中書令許之授侍中河中

尹晉絳等州節度觀察使夏四月乙卯嗣岐王珍得罪

廢為庶人於漆州安置

按舊書在四月乙亥朔據本年正月丁亥朔則四月朔不應是

乙亥今從通鑑作乙卯

己未以吏部侍郎裴遵慶為黃門侍郎同

中書門下平章事青州刺史尚衡兗州刺史能元皓並

奏破賊壬午梓州刺史段子璋反陷遂州刺史嗣虢王

巨死之五月甲午史朝義將令狐彰以滑州降授御史

中丞依前滑魏德貝相六州節度使

胡三省曰滑衛相貝魏博六州按

舊書脫衛州胡三省注增衛博二州而無德州考方鎮表是年置滑衛節度治滑州領州六滑衛相魏德貝尋

以德州隸淄沂節度而增領博州故胡注無德州也乙未劍南節度使崔光遠克

東川段子璋伏誅庚子進李光弼太尉兼侍中充河南副元帥都統河南淮南山南東道五道行營節度鎮臨淮北京留守王思禮卒辛丑以鴻臚卿管崇嗣為太原尹北京留守河東節度副大使六月己卯以鳳翔尹李鼎為隴右節度營田等使秋七月癸未朔日有食之八月辛巳以李若幽充朔方鎮西北庭陳鄭等州節度使賜名國貞九月壬寅大赦去乾元大聖光天文武孝感



之號其年號但稱元年去上元之號以十一月為歲首  
月以斗所建辰為名元年建子月丙午衛伯玉及史朝  
義戰于永寧敗之己酉朝獻于太清宮庚戌享于太廟  
建丑月辛亥有事于南郊己未來瑱及史朝義戰于汝  
州敗之乙亥侯希逸及朝義將李懷仙戰于范陽敗之  
寶應元年建寅月丙戌盜發敬陵惠陵甲辰李光弼克  
許州戊申史朝義陷營州建卯月辛亥大赦賜文武官  
階爵以京兆府為上都河南府為東都鳳翔府為西都

江陵府為南都太原府為北都壬子羌渾奴刺寇梁州  
癸丑河東軍亂殺其節度使鄧景山乙丑河中軍亂殺  
李國貞及其節度使荔非元禮建辰月甲午奴刺寇梁  
州戊申蕭華罷以戶部侍郎元載同中書門下平章事  
建巳月壬子楚州刺史崔旆獻定國寶玉十三枚甲寅  
聖皇天帝崩帝自仲春不豫聞上皇登遐疾轉劇乙丑  
詔皇太子監國大赦改元為寶應元年復以正月為歲  
首餘月並依常數丙寅帝崩于長生殿年五十二諡曰

文明武德大聖大宣孝皇帝廟號肅宗陵曰建陵

肅宗至德一載

至德元載即玄宗天寶十五載

乾元二年上元二

年寶應一年凡五年

欽定續通志卷八